

光緒山西通志

鄉賢錄十一

錄二之十一

山西通志第百二十六

卷二十六

賜進士出身頭品頂戴兵部侍郎兼都察院右副都御史巡撫山西提督軍務臣張

旨監修

遼金

邢抱朴應州人父簡刑部郎中母陳氏生六子親授以經抱朴性穎悟好學博古保甯初爲政事舍人知制誥累遷翰林學士加禮部侍郎統和三年命勾檢顯陵四年山西州縣被兵命往鎮撫民始獲安加戶部尙書遷翰林學士承旨與室昉同修實錄決南京滯獄還優詔褒美十年拜參知政事韓德讓薦按察諸道守令能否而黜陟之大協人望素以孝稱母憂去官詔起視事乞終制宰相密論上意乃從及耶律休哥留守南京多滯獄復詔平鞠人無冤者二十年改南院樞

密使又二年卒輟朝三日贈侍中弟抱質統和二十九年由南府宰相擢知南院樞密使事以年老詔乘小車入朝開泰元年命督有司具拜山大射柳禮儀復爲大同軍節度使加開府儀同三司守司空兼侍中時人榮之

陳昭袞小字王九雲州人工譯鞬勇而善射統和中補祇候郎君爲奚拽刺詳穩累遷致睦宮太保兼掌圍場事開泰五年秋大獵帝射虎以馬馳太速矢不及發虎怒奮勢將犯蹕左右辟易昭袞捨馬捉虎兩耳騎之虎駭且逸上命衛士追射大呼止之虎雖軼山終不墮地伺便拔佩刀殺之輦至上前慰勞良久卽日設燕悉賜以席上金銀器特加節鉞遷圍場都太師賜國姓命張儉李德懋賜詩以美之後拜歸義軍節度使同知上京留守歷西南面招討都監卒

右遼二人

附見一人

郭文振字拯之太原人承安二年進士累官遼州刺史充宣差從宜都提控治遼深得眾心興定三年遷授中都副留守權元帥左都監行河東北路元帥府事招降太原東山二百餘村遷老幼於山寨得壯士七千分駐營柵防護秋穫奏若秋高無兵直取太原河東可復優詔許之十月權右都監與張開合堅臺州兵復取太原四年請升樂平縣爲舉州壽陽縣西張寨爲晉州從之上疏乞選重臣復於潞州置行省其時澤潞已詔張開規畫不能盡用其言二月封晉陽公河東北路皆隸焉奏調協孟州提控伯德安事遼近臣慰諭又奏武仙所統境土甚大雖與林州元帥府共招撫之乞更選本土州縣官重其職任同與安集可使還定宣宗用其策又薦

葭州刺史古里甲蒲察行嵐管陝石甯化保德諸州元帥府事從之元光元年復奏河朔百姓引領南望臣再四請於樞府但以會合府兵爲言公府雖號分封力實單弱且不相統攝所在被兵朝廷不卽遣兵復河北人心將以爲舉河朔而棄之甚非計也大抵欲起胥鼎爲行省定河北朝廷不能用二年詔應援史詠復河東是歲遼州不能守徙其軍於孟州以部將郝安等爲副護沿山諸寨累辭公府不許頃之部將汾州招撫使王遇與孟州防禦使納蘭謀古魯不相能復徙衛州自此不可以爲軍迄正大間寓於衛而已

張著字庭俊太原陽曲人明昌二年進士授平遙丞歷洛交雲川二縣令由轉運判官入拜監察御史泰和初元妃李氏干預時政其兄黃門喜兒嘗以水田事私請於著著以正義

賁之既居臺諫上書言妾上僭后之失引援古今陳說成敗時論趨之胡沙虎尹大興驕恣不法朝臣無敢言者著率諸御史發其奸章至十餘上章宗爲動容扈從秋山居民爲近侍所擾著易大席帽屏跡行園中杖大奴十餘人權貴爲斂手至相警曰大席帽來矣其威望如此出爲同知震武節度使歷南京路按察副使甚有威惠大安中厯知景州漕運僉陝西按察使貞祐二年改同知河間府元兵至其帥不能軍城陷著率壯士數百督戰沒於陣著性剛果明於剖析所在吏畏民懷有古能吏風子綽以蔭擢官

王渥字仲澤以字行太原人性明俊不羈博學善談論工尺牘字畫清美有晉人風少游太學長於詞賦登興定二年進士第爲時帥奧屯邦獻完顏料烈所知故多在兵間後辟甯

陵令有治蹟入爲尚書省令史使宋至揚州應對敏給宋人重之還爲太學助教轉樞密院經歷官俄遷右司都事稍見信用及內族思烈行省事於鄧州以渥爲左右司員外郎從行思烈入援自汝州過密縣遇元兵武仙欲阻澗思烈不聽渥勸曰武仙大小數百戰經涉不爲不多兵事當共議思烈疑其與仙有謀幾斬之渥自以爲無愧於內不懼也已而思烈果敗渥歿於陣

趙隘太原人讀書肄業元兵入境隘鳩合土豪保聚山陝屢戰有功晉陽公郭文振署爲壽陽令駐兵榆次遂率眾收復太原夜登其城護老幼二萬餘口以出升太原治中擢同知府事兼招撫使元光元年元兵攻城急知不可支迺殺妻子沈符印自殺宣宗聞之嘉歎贈銀青榮祿大夫河東北路宣

撫使諭有司求其子孫錄用

以上太原府

郭子通洪洞人且子年二十八登詞賦高第大定初擢陝西西路轉運司都勾判官時晉絳戶稅轉輸平涼子通監視官吏秋毫無犯二州民舉手加額後爲絳陽軍節度副使蒞官日父老稱幸甫期年大治絳人繪像天甯寺立石頌德終清河防禦使

馮延登字子俊吉州吉鄉人世業醫以幼穎悟令事舉業登承安二年詞賦進士第調臨真縣簿德順州軍事判官泰和元年轉甯邊令大安元年七月雹害稼發粟賑貸全活甚眾貞祐二年補尙書省令史尋授河中府判官兼行尙書省左右司員外郎興定五年入爲國史編修改太常博士元光二年知登聞鼓院兼翰林修撰奉使夏國就充接送伴使正大

七年遷國子祭酒假翰林學士承旨充國信使以八年春至
虢縣營元主問汝識鳳翔帥否對曰識之又問何人曰敏於
事者也又曰汝能招降卽賞汝死對曰臣奉使請和招降豈
使職乎招降亦死還朝亦死不若今日卽死爲愈也明日復
問汝曾思之否對如前問至再三執義不回又明日乃云汝
罪當死但古無殺使者理汝愛汝鬚髯猶汝命也叱左右以
刀截去之延登岸然不動乃監之豐州三年後放還哀宗撫
慰久之復官祭酒歷禮吏二部侍郎權刑部尙書明年元兵
圍汴倉卒逃難爲騎所得欲擁而北行延登辭情慷慨躍入
城旁井死年五十八

以上平陽府

麻秉彝字仲常唐金吾衛中郎將嗣宗之裔登皇統九年進
士調河中府市丞西京都市令革舊弊折豪強留守徒單公

嚴置幕下大定初除大興府推官盜賊旁午繫者累如乘彝
悉平決之世宗嘉歎推官品第七乃陟爲第六自乘彝始時
繕修宮室火禁嚴甚有百夫長禍一役投火鑣鉄石以火者
送府獄其鑣石裏以奇帛乘彝曰貧人安得此乃遣人物色
之百夫長之子所衣帛正同一問得其情十一年調平陽岳
陽縣令時洪洞趙城爭水部檄委乘彝司水者十餘人賊賄
狼藉乘彝盡寘於法自是無訟二縣民刊石以紀十四年召
拜右三部司正令史董潤隔垣投瓦礫中親軍傷額大興府
罪以故乘彝以爲非耳目所及卒以過失論山東有殺人者
法司當以鬪乘彝曰鬪其牘其人將死時猶有和同之語非
鬪也卒以殺論十六年冬借尙書兵部郎中館伴夏國使十
七年改兵部主事明年正月春蒐攝行宮六部主事歸遺疾

卒年四十九秉彝爲政主仁濟以強明性敏悟八歲知屬文
王彥潛學士評其詩似杜牧之有貽溪集二十卷行世子邦
憲武略將軍河中府軍資庫副使邦甯武義將軍鳳翔縣令
李獻能字欽叔河中人先世有爲金吾上將軍者時號李金
吾家追獻能以文學名從兄獻卿獻誠從弟獻甫相繼擢第
故李氏有四桂堂獻能苦學博覽作詩有志風雅刻意樂章
於文尤長四六貞祐三年特賜詞賦進士廷試第一人宏詞
優等授應奉翰林文字應機敏捷號得體趙秉文李純甫嘗
曰李獻能天生今世翰苑才每薦之不令出館居凡十年出
爲鄜州觀察判官用薦復爲應奉俄遷修撰正大末以鎮南
軍節度副使充河中帥府經歷官元兵破河中奔陝州行省
以權左右司郎中值趙三軍變遇害年四十三獻能涉小墨

色耀有髯善談論每對說今古聲鏗亮可聽家故饒財盡於
貞祐之亂在京師無以自資其母素豪奢厚於自奉小不如
意必加訶謫人視之殆不堪獻能處之自若時以純孝稱之
李獻甫字敘用獻能從弟也博通書傳尤精左氏及地理學
爲人有幹局興定五年登進士第正大初夏使來請和馮延
登往議獻甫爲書表官從行夏時以歲幣爲言延登不能折
獻甫從旁力爭之議遂定天興元年充行六部員外郎守備
之策時相倚任之以功遷鎮南軍節度副使兼右警巡使死
蔡州之難年四十所著文章號天倪集傳於世

侯小叔河東縣人爲河津水手貞祐初籍充鎮威軍以勞補
官元光元年遷府判官權河東南路安撫副使元兵圍河中
盡護農民入城以家財賞戰士圍始解遷治中安撫如故樞

密院奏小叔才能可用權位輕不足威眾乞假符節詔權元帥左都監便宜從事提控吳德說小叔出降叱出斬之表兄張先復從容言出降保妻子怒謂先曰我舟人子致身至此何云出降縛於柱殺之飯僧祭葬以盡賊黨之禮頃之樞密院遣都監詵論來議兵事因出城會議石天應乘機取河中府作浮橋通陝西小叔駐樂李山寨眾兵畢會夜半坎城以登焚樓櫓火照城中天應大驚盡棄輜重牌印馬牛雜畜死於雙市門小叔燒絕浮橋撫定其眾遷昭毅大將軍遙授孟州防禦使同知河中府事二年正月元軍十萬圍城總帥詵可遣提控孫昌率兵五千樞密副使完顏賽不遣李仁智率兵三千來援約夜中鳴鉦內外相應及期小叔出兵戰昌仁智不敢動復斂眾入城圍益急眾議出保山寨小叔曰去何

之密遣經歷張思祖奔告於汴明日城破小叔死不得其尸
或疑尙在中條諸寨無所統領後四十餘日乃詔河中推官
籍阿外權領右都監總其軍宣宗思小叔功下詔褒贈切責
訛可不救河中之罪

強仲本河中射糧軍子弟貌淺陋而膂力過人興定初從華
州副都統安甯復潼關有勞監邠陽醕後客洛下選充官軍
戍陝鐵嶺軍潰被執從都尉烏林答胡土竄歸中京留守撒
合輦死元帥左監軍任守真復立府事以便宜署仲警巡使
守真又死鄭州天興元年八月中京人推仲爲府僉事領軍
二千五百人傷殘老幼半之甫三日復被圍東西北三面多
樹大礮伸括衣帛爲幟立之城上募壯士得五千人赤身而
戰往來救應大叫以愁子軍爲號其聲勢與萬眾無異刮錢

爲鏃得元兵一箭截而爲四以簡鞭發之創過敵礮能發大石於百步外所擊無不中伸奔走四應所至必捷得二駝及所乘馬皆殺之以犒軍士得一嚮如賜百金九月元兵退百里外閏月復攻一月兵倍前不能拔事聞哀宗降詔褒諭以伸爲中京留守元帥左都監世襲謀克行元帥府事二年二月建一堂於洛川驛之東名曰報恩刻詔文於石誓以死効三月中使至以伸便宜從事時行省思烈卒胡土代伸行總帥府事月餘糧盡軍民稍稍散去五月元兵復來陣於洛南仲陣水北有韓帥者匹馬立水濱招伸降伸責曰君獨非我家臣子耶旣不能勤王乃欲誘我降耶我本一軍卒今貴爲留守誓以死報國遂躍而射之帥奔陣率步卒數百奪橋伸軍一旗手獨出拒之殺數人卽手解都統銀符佩之士氣復

振初築戰壘於城外四隅至五門內外皆有屏謂之迷魂牆
元兵以五百騎迫之伸率部下二百鼓譟而出元兵退六月
胡土走鷹揚都尉獻西門以降伸知城不能守率死士數十
人突東門出轉戰至偃師力盡就執載以一馬擁迫而行宛
轉不肯進強掖之及中京七里河將見大帥塔察語益激兵
卒曰此人乖角如此其能降乎不若殺之因好語誘曰汝能
北面一屈膝吾貸汝命伸不從左右力持使北伸拗頭南向
遂殺之

盧芝字廷瑞河東人任子補官以西安軍節度使行部尙書
石玠字子堅河中人崇慶二年進士以汝州防禦使行部侍
郎天興二年九月河南行省武仙由浙川至黑谷泊進退失
據謀北走二人相與謀曰吾等知仙不卹國家久矣諫之不

從去之未可事至今日正欠蔡州一死耳假若不得到蔡州死於道中猶勝死於仙也既去仙始覺追玠殺之芝走至南

陽爲土賊所害

以上蒲州府

李晏字致美澤州高平人性警敏倜儻尚氣登皇統六年經義進士調岳陽丞轉遼陽推官中牟令海陵方營汴京領運材木於河以經三門之險衝決失敗者眾乃馳白行臺散投其木於水計數於下流接取人皆便之內艱服除補尚書省令史辭爲衛州防禦判官世宗素識其才名召爲應奉翰林文字五遷祕書少監兼禮部郎中除西京副留守召爲翰林直學士兼太常少卿以母老乞歸養授鄭州防禦使母卒起復爲直學士上嘗御後閣召晏讀新進士所對策因問縣令闕員取之何道對曰國朝設科取士始分南北兩選北選百

人南選百五十人合二百五十人詞賦經義入仕之人既多所以縣令未嘗闕員其後南北通選止設詞賦一科每舉限取六七十人入仕既少縣令闕員蓋由此也上以爲然詔後取人毋限以數尋擢吏部侍郎兼前職諭以卿性果敢有激揚之意故以授卿宜加審慎毋涉荒唐俄爲中都路推排使遷翰林侍讀學士兼御史中丞初錦州龍宮寺遂主撥賜戶民輸稅歲久皆以爲奴有欲訴者害之島中晏乃具奏曰遼以良民爲二稅戶此不道之甚也乞盡釋爲良於是釋爲良者六百餘人故宰臣謀衍家民質券積不能償因沒爲奴事下臺亦奏免之尋爲賀宋正旦國信副使世宗不豫命宿禁中一時詔冊皆晏爲之章宗立書上十事其一風俗奢僭宜定制二禁游手三宜停鑄錢四免上戶管庫五太平宜興

禮樂六量輕租稅七減鹽價八免監官陪納虧欠九有司尙
苟且乞申明經久遠圖十禁網差密宜尙寬大又奏乞委待
制黨懷英修撰張行簡更直進讀陳言文字以廣視聽皆採
納之年老乞致仕改禮部尙書兼學士承旨授沁南軍節度
使久之致仕上念晏先朝舊人復起昭義軍節度使明昌六
年歸老承安二年卒年七十五謚文簡

李仲略字簡之晏子聰敏力學大定十九年詞賦進士調五
臺主簿轉韓州判官遷晉城令補尙書令史除翰林修撰領
左司一日奏事退上顧謂近臣曰仲略精神明健如俊鶻脫
鞵未幾轉員外郎以親病求侍特授澤州刺史以便祿養先
是晏領沁南節度澤於懷爲支郡父子相繼鄉人榮之父喪
免起爲戶部郎中時命六品以上官十日以次對乃進言曰

凡救其末不若正其本所謂本者厚風俗去冗食養財用而已又條陳制度之宜上嘉納之俄授翰林直學士兼前職命充經義讀卷官上問曰有司謂經義不若詞賦罷之何如奏曰經乃聖人之書明經所以適用非詞賦比乞自今以經義進士爲考試官庶得碩學之士上可其奏改吏部郎中遷侍郎兼翼王傅俄兼宛主傅時知大興府事紇石烈執中坐贓命鞠之罪當削解權要競言太重奏曰教化之行自近者始京師四方之則郡縣守令無慮數百此而不懲何以勵後況執中凶殘狠愎慢上虐下豈可宥之上曰卿言是也授山東東西路按察使泰和五年卒上聞之歎曰此人於國家宣力多矣何遽至是耶贈朝列大夫謚襄獻仲略有父風剛介特立不阿權貴臨事無留滯所任以幹濟稱云

郭俛字伯有澤州人登大定二十二年進士調長子主簿累進大理司直母憂起復太常博士左司都事御史臺舉俛才幹可用遷平陽府治中久之召爲同知登聞鼓院兼祕書丞遷禮部郎中滕州刺史同知正定府事上官每季合注巡尉官吏刑兩部斟酌盜賊多寡處選注詔議行之改中都西京按察副使遷國子祭酒泰和六年伐宋充宣差山東安撫副使歷遼東按察轉運使至行六部尙書改河北西路轉運使致仕元光二年卒

王晦字子明澤州高平人少負氣自意常慕張詠之爲人中明昌二年進士調長葛主簿有能聲察廉除遼東路轉運司都勾判官提刑司舉其能轉北京轉運戶籍判官遷安陽令累遷戶部郎中貞祐初或舉晦有將帥才俾募人自將得死

士萬餘統之衛送通州粟入中都有功遷霍王傅以部兵守
順州攻牛欄山以解通州之圍遷翰林侍讀學士加勸農使
九月順州受兵遣人突圍召滄景別部兵主者不肯發故部
曲王臻請變計晦曰朝廷何負汝耶臻曰臻雖負國不忍負
公因泣下晦叱曰吾年六十致位三品死則吾分詎從女耶
將射之臻掩泣而去將士縋城出降晦被執不肯降遂就死
愛將牛斗併見殺贈榮祿大夫樞密副使命有司立碑歲時
致祭錄其子汝霖爲筆硯承奉

趙楠字庭幹高平人擢進士第天興元年爲刑部郎中十一
月右丞相延安郡忠正王僕散端孫忙押門定國軍節度使
納坦出之子也與兄石里門及護衛顏蓋宗阿同飲忙押門
詐以事出投北兵尙書省令楠推其家屬及同飲人時上下

迎合必欲以知情處之忙押門妻皆被訊掠其母完顏氏曰
忙押門通其父妾父殺此妾忙押門不自安遂叛求脫命而
已委曲推問無知情狀省中微聞之召小吏郭從革諭以風
旨從革言之楠方食擲匕筋於案大言曰甯使趙楠除名亦
不能屈斷無辜人遂以不知情奏且以妾事上聞上曰丞相
功臣納坦出父子俱受國恩吾已保其不知情也立命赦出
之人胥謂楠有于張風

以上澤州府

蘇保衡字宗尹雲中天成人父京遼進士爲西京留守宗翰
兵至京出降久之病篤託以保衡京死宗翰薦之於朝賜進
士出身補太子洗馬調解州軍事判官辟撤離喝陝西幕府
參議軍事累官同知興中尹天德間繕治中都張浩舉分督
工役改大興少尹督諸陵工遷工部尙書會伐宋與徐文等

督造戰艦於通州兵興以爲浙東道水軍都統制率舟師泛海徑趨臨安宋兵來襲敗於海中副統制鄭家死之大定二年召赴中都時山東盜賊嘯聚百姓困弊詔保衡安撫山東發倉粟給布帛無妻室者具名以聞還改刑部尙書遣往河南山東陝西宣問屯田軍人有立功者具名以聞先登敗敵者正軍及阿里喜補官一階猛安謀克上功狀尙書省僕散忠義伐宋命行戶部於關中兼糾察許以便宜黜守令不法者十餘人邠守傅慎微忤用事者被讒搆下獄力救之得免入爲太常卿遷禮部尙書拜參知政事三年宋人請和詔往南京與忠義斟酌事宜行之入奏進尙書右丞詔監護諸殿役六年冬有疾求致仕不許七年二月庚寅卒年五十五輟朝賻贈命有司致祭

康元弼字轉之大同雲中人幼敏學善屬文登正隆二年進士第調汝陽縣簿改崇義軍節度判官由垣曲縣令補尚書省令史累遷同知河北西路轉運使事召爲大理丞大定二十七年河決曹濮間涉水者多墊溺遣往相視其地如盜而城在盜中請命於朝徙築北原曹人賴焉出爲宏州刺史閱歲授大理少卿先是衛城亦爲河壞增築蘇門以寓州治水既退民不樂遷欲復歸衛又遣元弼按視還言治故城便遂復其舊轉祕書少監兼著作郎改通州刺史兼領漕事章宗立尊孝懿爲皇太后以元弼舊臣詔充副衛尉再轉大理卿以喪去起復爲刑部侍郎兼邾王傅遷南京路轉運使承安三年致仕卒

高汝礪字巖夫應州金城人登大定十九年進士第蒞官有

能聲累除同知絳陽軍節度事明昌五年選陞石州刺史承安元年入爲左司郎中遇紫宸殿奏事侍臣皆迴避上涼扇忽墮案下以非職不敢取進上以爲知體尋擢左諫議大夫建言郡縣調發軍需追胥走卒利其事急規取貨賂深爲民害自今有犯者乞權依推排受財法治之庶使小人有所畏懼上從其言定軍前差發受財制時遇奏事臺臣亦令迴避汝礪請有司奏事諫官得以預聞修注職皆當一體從之尋同知大興府事歷陝西東路轉運使泰和元年改西京路轉運使六年六月拜戶部尙書時鈔法不能流轉隨事上言多所更定民甚便之貞祐二年宣宗南遷次邯鄲拜參知政事次湯陰聞汴京穀價騰踊宰臣請命留守司禁約汝礪曰物價低昂朝夕或異然糴多糶少則貴諸路之人輻湊河南糴

者既多安得不貴若禁止之有粟之家皆將閉而不出商旅轉販亦不復入城則糴者益急而貴益甚矣今穀少而難得鈔多而易致自當先其所難後其所易多方開誘務使出粟更鈔例穀價自平矣上從之三年五月北兵將渡河朝議盡起河北諸路軍戶共圖保守而徙其家屬於河南汝驪言此事果行但便於豪強貧戶安能徙乞先令元帥府宣撫司總督府熟論可否然後施行不報軍戶既遷將括地分授之佃官田者亦言願以給軍汝驪奏遷徙軍戶一時之事民佃官田久遠之計惟當倍益官租以給軍糧之半復以係官荒田牧馬草地量數付之令其自耕則百姓免失業而官司不爲厲民矣上從之尋遷尙書右丞又奏在官荒田及牧地民多私耕今正藝麥時乞盡九月而後撥量收所得以補軍儲則

公私俱便十月又言今河北軍戶徙河南者幾百萬口人日
給米一升歲率三百六十萬石半給其直猶支粟三百萬石
河南租地計二十四萬頃歲徵粟纔一百五十六萬有奇乞
倍徵以給仍以閑田及牧地界之乃遣右司諫馮開等分給
人三十畝而軍人皆言地瘠惡不可耕可耕者又僻遠汝礪
遂請罷之給軍糧之半而半折以實直焉四年正月轉左丞
乞致仕不許時議發兵河北護民芟麥民間傳官將盡收之
高琪奏樞密院遣兵居衝要鎮遏土寇仍許收逃戶之田汝
礪曰甚非計也河朔之民惟恃麥今已有流言而復以兵往
是益使之疑懼也不若聽其自便令宣撫司禁戢無賴足矣
逃戶田歸有司可也後卒罷又請召還行樞密副使胥鼎於
朝省不從高琪欲歲閱民田汝礪言其三不可議遂寢興定

元年十月邊臣請與宋議和以息民疏言其非計時宣宗志在南伐也十一月上言臣聞國以民爲基民以財爲本是以王者必先愛養基本國家調發河南爲重所徵稅租率常三倍於舊今省部計歲收通寶不敷所支乃於民間科斂桑皮故紙錢七千萬貫以補之近以通寶稍滯又加兩倍河南人戶農居民三之二今稅租猶多未足而此令復出彼不難所當輸租則必減其食以應之夫事有難易勢有緩急今急用而難得者芻糧也出於民力其來有限可緩圖而易爲者鈔法也行於國家其變無窮而者大鈔滯更爲小鈔小鈔弊改爲寶券寶券不行易爲通寶從權制變皆由於上尙何以煩民爲哉彼悉力以奉軍儲已患不足而又添徵通寶苟不能給則有逃亡民逃亡則農事廢兵食何自而得有司不究道

圖而貪近效不固本原而較末節誠恐軍儲鈔法兩有所妨
惟陛下外度事務俯察臣言特命有司減免則羣心和悅而
未足之租有所望矣時賈全苗道濶等相攻不和廷議將分
界州縣別署名號以處之又上書言其非計議遂寢三年河
南頗豐稔民多積粟汝礪奏國家之務莫重於食今所在屯
兵益眾而修築新城其費亦廣若不及此豐年多方營辦防
秋之際或乏軍興乞於河南州府權宜立式凡內外四品以
下雜正班散官及承蔭人免當僦使監官功酬僧道官師德
號度牒寺觀院額等並聽賣之司縣官有能勸誘輸粟至三
千石者將來注授升本榜首五千石以上遷官一階萬石以
上升職一等並注見闕庶幾人知勸募多所收穫從之提舉
權貨司王三錫建議權油高琪以用度方急勸上行之汝礪

上言其五害詔集百官議禮部尙書楊雪翼等多以爲不可
遂罷之十月賜金鼎一重幣三四年三月拜平章政事俄進
尙書右丞相監修國史封壽國公屢乞致仕不允十月遷榮
祿大夫元光二年詔免朝拜侍立仍勅有司殿下設榻上嘗
論人才對曰心不正而濟之以才所謂虎而翼者雖古聖人
亦未易知又曰人才少全亦隨其所長取之耳上胥以爲然
哀宗初告老優詔不許正大元年三月卒年七十一配享宣
宗廟庭

雷淵字希顏一字季默渾源人思子淵庶出父沒不能安於
家乃發憤入太學衣敝履穿臥榻無席恆兀坐讀書其友商
衡每調恤之後從李之純游爲詩文喜新奇與康錫翼禹錫
齊名俱登至甯元年詞賦進士甲科攝遂平縣事調涇州錄

事坐高庭玉獄幾死後改東平河朔驕將悍卒倚外敵爲重
自行臺以下皆撫摩之淵出入軍中偃然不爲屈不數月閭
巷多畫像以事雖大將亦不敢易之尋遷東阿令轉徐州觀
察判官興定未召爲英王府文學兼記室參軍轉應奉翰林
文字正大庚寅倒迴谷之役嘗上書破朝臣孤注之論引援
深切灼然易見主兵者阻之策竟不行拜監察御史言五事
稱旨其所彈劾不避權貴出巡郡邑所至有威譽奸豪不法
立箠殺之至蔡州杖殺五百人號雷半千爲人所訟罷去久
之宰相侯摯薦爲太學博士南京轉運司戶籍判官入爲翰
林修撰一夕暴卒年四十八淵軀幹雄偉髯張口哆顏渥丹
眼如望洋遇不平則疾惡之氣見於顏間或嚼齒大罵不休
善結交凡當塗貴要與布衣名士無不往來居京師賓客踵

門雖貧而待客甚腆蒞官喜立名凡居一職輒震耀亦坐此
不達

劉從益字雲卿渾源人高祖擢天會初詞賦進士子孫多出
科第入仕從益博學通經能文詩九工五言登大安元年進
士累官監察御史坐與當路辨曲直得罪去久之起爲葉縣
令修學勵俗有古良吏風葉自兵興戶減三之一田多不毛
其歲賦七萬如故乃請於大司農爲減一萬民甚賴之流亡
歸者四千餘家未幾被召百姓乞留不許入授應奉翰林文
字踰月疾卒年四十四葉人聞之以端午罷酒爲位而哭自
立石頌德焉有蓬門集若干卷子祁在太學有文名值金未
喪亂作歸潛志與元裕之王辰雜編雖微有異同而金末事
猶足徵焉

魏璠字邦彥宏州順聖人家渾源貞祐二年進士天興元年
哀宗走歸德時璠爲翰林修撰遣問道召參知政事河南行
省武仙行至裕州會仙敗於柳河乃矯詔招集潰軍以待仙
仙疑璠圖己二年正月仙閱兵選鋒尙十萬璠曰主上旦夕
西首望公公不宜久留於此仙怒幾殺璠璠還歸德仙奏請
誅璠哀宗不聽以璠爲歸德元帥府經歷官

康公弼應州人舉進士累官乾州節度使初爲甯遠令歲款
請蠲賦民爲立祠嘗陷盜中盜使護送出境曰此良吏也

府大同

楊沃衍本名翰烈朔州靜邊官莊人少爲北邊屯田小吏元
兵入境率本族唐和迪刺部入保朔州南山茶杷溝朝廷遣
人招之與眾來歸授武州刺史武州屢經殘毀貞祐二年二

月元兵來攻死戰二十七晝夜不能拔乃退以功擢本州防禦使武州軍民遷尙嵐州升尙嵐爲節鎮卽以爲節度使諭曰卿於國盡忠屢有勞績其益勵忠勤與宣撫使輯睦以安軍民旣奉詔卽以身許國曰不死王事而死於家非大丈夫也三年屯涇邠隴三州有軍九千分爲十翼五都統親統者十之四是冬與夏人戰俘斬幾二千獲馬八百餘匹器械稱是興定元年賜姓兀林答未幾遙授通遠軍節度使兼鞏州管内觀察使將兵五千從元帥白撒伐宋出鞏州鹽井至故城逢夏兵三百擊走之又入西和州至岐山堡遇宋兵六千凡三隊遣軍分擊逐北三十餘里斬首四百級生擒人馬甲仗尋復得散關二年遷官一階遙授知臨洮府三年武休關之捷功居多元光元年遙授中京留守俄拜元帥右監軍世

襲納古胡里愛必刺謀克二年春元兵游騎數百掠延安而南約陀滿胡土門以步軍會戰胡土門宿將常輕沃衍遂失期沃衍獨率兵追之野豬嶺獲四人而還欲斬胡土門諸將哀請乃釋之俄而兵大至駐德安寨復擊走之未幾元兵攻鳳翔還道出保安遣提控完顏查剌破於石樓臺前後獲馬二百符印數十詔有司論賞時元兵破西夏長驅至關輔皆洶洶不安獨沃衍率其步將劉興哥往來邠隴間屢戰屢勝故元兵不能東陝西行省檄令清野不從嘆息曰我若清野明年民何所食遂隔大澗持勢使民舉麥事正大二年進元帥左監軍遙領中京留守八年冬合達蒲阿入鄧州留沃衍守閔鄉詔令取洛南路入商州備上津與武仙相犄角謀知元兵由豐陽而東還會二行省軍於五朶山下憤曰平章參

政蒙國厚恩握兵柄失事機不能禦戰乃縱兵深入尙何言耶三峰敗沃衍走鈞州其部曲白留奴呆劉勝降元請招沃衍元帥令勝見沃衍曰降則授大官沃衍善言慰撫之使前拔劔斫之曰我起身細微蒙國大恩汝欲以此污我耶遂遺語部曲後事望汴京拜且哭曰無面目見朝廷惟有一死耳卽自縊部曲舉火並所寓屋焚之從死者十餘人時年五十

二湖平

閻顯樂平人天會間充義兵千戶剛勇有才時干戈甫定關草萊招離散境內以安官至龍虎衛將軍沁南節度使弟甫才智明敏懷遠大將軍招撫副使

楊雲翼字之美其先贊皇檀山人六代祖忠客平定之樂平遂家焉曾祖青祖郁考恆皆贈官雲翼天資穎悟初學語輒

畫地作字日誦數千言明昌五年經義進士第一詞賦亦中
乙科特授承務郎應奉翰林文字承安四年出爲陝西東路
總管府判官泰和元年由太學博士遷太常寺丞兼翰林修
撰七年歷僉上京東京路按察司事章宗召見咨以當世之
務稱旨大安元年張行簡薦其才且精術數授提點司天臺
兼翰林修撰有以太乙新歷上進者尙書省檄令參訂摘其
不合者二十餘條歷家稱焉俄授禮部郎中崇慶元年以病
歸貞祐二年宣宗閱官簿記其姓名起授前職兼吏部郎中
三年轉禮部侍郎仍兼提點於國家事知無不言四年元及
夏兵入鄜延潼關失守朝議用兵部尙書蒲察阿里不孫爲
副元帥以禦之雲翼言其人言浮於實必誤大事不聽後果
敗時主兵者不能外禦而欲取償於宋故頻歲南伐但有言

者則謂與宋有謀陰爲之地雖宰執不敢發一語雲翼獨當
建言及時全倡議南伐宣宗以問雲翼雲翼力沮之章奏不
報時全果大敗於淮上一軍全沒宣宗責諸將曰尙使我何
面目見楊雲翼耶河朔民爲游騎所迫汭河而南論罪當死
雲翼曰法所重私渡者防奸僞也今平民特爲道死計而有
司殺之後惟從敵而已宣宗悟盡釋之興定元年六月遷翰
林侍講學士兼修國史知集賢院事兼前職論以卿遇事敢
言議論忠讜故特留之右丞相高琪主權油議百官同聲獨
與趙秉文時戡等數人以爲不可議遂格高琪後以事譴之
不恤也二年拜禮部尙書三年築京師子城役兵民數萬翼
秋病者相籍雲翼提舉醫藥多所全濟四年改吏部尙書及
御史中丞哀宗卽位首命攝太常卿尋拜翰林學士時河南

早詔遣官理冤獄而不及陝西雲翼上言天地人通爲一體豈可專治一支受病處而置其餘哉上是之正大三年復爲禮部尙書兼侍讀詔集百官議省費雲翼曰省費事小戶部司農足以辦之尙書省出政之地事無大小皆當總領今軍旅大事樞密專制宰相不得預聞欲使利病兩不相蔽得乎上嘉納之明年設益政院以爲選首每召見賜坐不名詔講尙書雲翼爲言帝王之學不必如經生分章析句但知爲國大綱足矣因舉任賢去邪與治同道與亂同事有言逆於汝心有言遜於汝志數條數釋詳明上聽忘倦尋與秉文同撰造龜鑑萬年錄二十篇當時朝士廷議多顧望依違寢以成俗一日經筵畢因言人臣有事君之禮有事君之義禮不敢齒君之路馬入君門則趨見君之几杖則起君命召不俟駕

而行受命不宿於家是皆事君之禮也然國家利害生民休戚君曰可而有否者替其否君曰否而有可者獻其可言有不從雖引裾折檻斷鞅軻輪有不恤焉苟徒徇事君之虛禮而不知事君之大義國家奚賴上改容禮曰非卿朕不聞此言又嘗患風痺稍愈上問愈之方對曰但當治心心和則邪氣不干治國亦然人君先正其心則朝廷百官莫不一於正矣上矍然知其爲醫諫也夏人旣通好遣徽猷閣學士李弁來議互市往返不能決遣雲翼往議乃定五年卒年五十九謚文獻雲翼天性雅重自律甚嚴而待人寬恕與人交分一定死生禍福不少變著文集校大金禮儀續通鑑若干卷周禮辨左氏莊列賦五星聚并辨縣象賦各一篇勾股機要象數雜說等書藏於家

以上平定州

張翰字林卿忻州秀容人大定二十八年進士調隰州軍事判官有誣昆弟三人爲劫者翰微行廉得其狀白於州釋之歷東勝義豐會州令補尙書省令史除戶部主事遷監察御史母憂闕調山東路鹽使父憂起復尙書省都事戶部員外郎大安間平章政事獨吉思忠參知政事承裕行省充左右司郎中論議不相叶累爭事不見省承裕就逮衛紹王召見翰撫慰之改知登聞鼓院兼前職遷侍御史貞祐初爲翰林直學士充元帥府經略官改戶部侍郎宣宗遷汴翰規措尾從糧草至正定上書言五事一強本當哀兵徒徙豪民以寔南京二足用當按蔡汴舊渠以通漕運三防亂當就集義軍假之官印使相統攝以安反側四省事縣邑不能自立者宜稍并之旣以省官且以備盜五推恩以示天子所在稱幸之

意上略施行之翰雅有治劑才所至輒辦遷河平軍節度使都水監提控軍馬使俄改戶部尚書庶事草略經度皆有條理是歲卒謚達義

周鼎字器之定襄人幼穎悟未十歲應童子舉年十八取平陽解登第釋褐授五臺縣簿外艱時中原受兵所在殘毀以便宜起定襄丞民賴以全活者甚眾遷陽曲令仕至朝請大夫興定間城陷與妻子俱歿於兵祀五臺陽曲名宦

元好問字裕之忻州秀容人父德明自幼嗜書口不言鄙事樂易無畦畛布衣蔬食處之自若家人不敢以生理累之累舉不第放浪山水間飲酒賦詩以自適年四十八卒有東巖集三卷好問七歲能詩年十四從郝天挺學不事舉業淹貫經傳百家六年而業成下太行渡大河爲箕山琴臺等詩趙

秉文見之以爲近代無此作也於是名震京師登興定五年進士第歷內鄉南陽令天興初由尚書省掾除左司都事轉行省左司員外郎入翰林知制誥金亡不仕爲文有繩尺備眾體其詩奇崛而絕雕剝巧縛而謝綺麗五言高古沈鬱七言樂府不用古題特出新意歌謠慷慨挾幽并之氣其長短句掄揚新聲以寫恩怨者又數百篇兵後故老皆盡蔚爲一代宗工四方碑板銘志盡趨其門晚年尤自任著作以金源氏典章法度幾及漢唐不可令一代之跡泯而不傳時金國實錄在順天張萬戶家願爲撰述旣而爲樂夔所阻而止乃構亭於家著述其上名曰野史采摭所聞有得輒以寸紙細字記錄至百餘萬言今所傳者有中州集及壬辰雜編後纂修金史多本焉卒年六十有八著文章詩若干卷杜詩學一

卷東坡詩雅三卷錦機一卷詩文自警十卷

以上
忻州

張永通五臺人大節之祖宋鄉學生舉鄉薦友睦兄弟田宅
悉以推之鄰有寄筭毫無所動試進士稿就未成真忽目眩
不能書有欲爲之代者不許曰予之忽不能視乃天之所以
示懲也代之則欺君以欺天矣得第何爲翰林蘇珊銘其墓
曰功名穢祗富貴浮雲宗族稱友鄉黨稱仁

張大節字信之擢天德三年進士第調崞縣丞改東京市令
世宗判留務甚愛重之海陵修汴京命領其役世宗改元或
勸東赴富貴可一朝遂答曰自有定分何遽爾隨例補尙書
省令史擢祕書郎大理司直會左警巡使闕世宗謂宰臣曰
朕得其人矣遂授大節以杖殺豪民解職未幾起授同知洛
州防禦使事入爲太府丞工部員外郎盧溝水囓安次承詔

該視隄城擢修內司使推排東京路戶籍人服其平進工部
郎中與吏部員外郎麻珪泣阜通監鑄錢積銅皆竊惡議徵
民所給直大節獨以爲有司受納之過於民何與事聞得免
就改戶部郎中廉得定襄退吏誣縣民匿銅者十八村坐吏
罪民斲石以頌召授工部侍郎改戶部世宗東巡徙太府監
從行支應皆藉以辦尋爲宋生日使還授橫海軍節度使過
闕謁謝東宮顯宗撫慰良久曰萬事惟中可也因榜其公堂
曰惟中郡境有巨盜久不獲因設方略擒之河自衛決而東
相宜繕隄水不爲害章宗卽位擢中都路都轉運使言河東
賦重宜減議者不同大節以他路田賦質之遂命減焉乞休
優以鄉郡徙知太原府近郭有男子被殺聞其妻哭聲不哀
召而審之果獲姦夫人以爲神西山有晉叔虞祠舊有施錢

輸公使庫悉還之令給營繕選授河東路提刑使未赴留知
大興府治有能名閔晟復移廣甯轉震武軍節度使部有銀
冶議以官權爲便獨奏山澤之利當與民共宜明示約束於
民授地輸課則游手者有所資當官者無所損斯爲兩便上
從之世宗嘗語宰臣大節賦性忠實果於從政遠在王儉之
上惜乎用之太晚又語近臣曰某某非不幹然不及張大節
忠實也致仕承安五年卒年八十大節廉勤好學能勵勉後
進所學得於任侗待侗子如親而加厚又善弈棋當世推爲
第一與張景仁埒

張巖叟字孟弼大節子大定十九年進士調葭州司候判官
再除雄州觀察判官補尙書省令史累刑部員外郎忻州刺
史父憂闋起復大理少卿河北東西大名等路按察轉運副

使入爲刑部侍郎太常卿兼國子祭酒大安三年集三品官
議奉諸城門以爲兵備嚴叟曰塞門所以受兵是任城而不
任人莫若遣兵擇將背城疾戰時議多之除鎮西軍節度使
移定國軍貞祐二年改昭義復移沁南逾年以老致仕退寓
洛陽卒

胥鼎字和之繁峙人平章持國子也大定二十八年進士第
入官以能稱累遷大理丞父喪起復爲著作郎宰臣奏鼎甚
幹濟章宗曰著作職閑今姑授之尋歷右司郎中工部侍郎
泰和六年言急遞鋪轉送文檄之制從之至甯初中都受兵
由戶部尙書拜參知政事貞祐初知大興府兼中都路兵馬
都總管二年正月民多闕食奏有能贍給貧人者宜計所贍
遷官升職以獎勵之遂定權賜恩例如進官升職丁憂人許

應舉求仕官監戶從良等入粟草各有數全活甚眾二年四月拜尚書右丞仍兼知府事五月宣宗南遷留爲汾陽軍節度使兼汾州觀察使十一月改知平陽府兼河東南路兵馬都總管三年四月建言利害如積軍儲備黃河選官獄獄簡將練卒鈔法版籍凡十三事上頗採用又請降空名宣勅千道度牒三千以補軍儲七月就拜宣撫使兼前職言代州戍兵不可調發又言清野當先太原北路而後平陽南路旣而元兵果出境賜詔獎諭尋進官一階又請便宜置總領義軍使副及彈壓每五千人設訓練一員四年正月元兵略霍吉隰三州復以步騎六萬圍平陽急攻十餘日屢紐之招還脅從人七千有奇績至者又六千餘請優加存恤二月拜樞密副使權尚書左丞行省於平陽凡所建言皆利益民兵不爲

高談虛畫事胥允行是歲冬元兵駐同耀鼎偵知勢將叩關
委河中經略使陀滿胡土門領軍赴援聞元兵已越關先遣
潞州元帥左監軍必蘭阿魯帶領軍一萬孟州經略使徒單
百家領兵五千由便道濟河以趨關陝自領河東南路懷孟
諸軍合萬五千由河中部道入援而遣河中府判官僕散掃
吾出領軍趨陝西併力禦之且慮北兵掘河移檄絳解吉陽
孟州經略司會兵以爲夾攻之勢已而元兵果由三門集津
北渡而去上言河北潰散軍兵流亡人戶及山西河東老幼
俱從河南在處僑居各無本業易至動搖儻北兵誘爲鄉道
驅之攻城豈不益資其力乞朝廷遣官撫慰及令所司嚴爲
防閑庶幾不至生孽上從其計遣御史陳規等充安撫捕盜
官巡行郡邑元兵還至平陽鼎遣兵拒戰不利乃去興定元

年拜平章政事封莘國公三月詔鼎舉兵伐宋且令勿復有言以沮成算鼎已分兵由秦鞏鳳翔三路並進而上書極陳其六不可宰臣以爲諸軍旣進無復可議遂寢元帥承裔等取宋大散關又克武休將至興元鼎請諭帥臣無肆焚掠若一郡帖然秋毫不犯則其餘三十軍將不攻自下矣上是之及論伐宋功遷官一階宣宗多親細務鼎以爲言上覽奏不悅三年元兵復入陝西令節制河東鼎多料敵策三年九月元兵徇東勝州又令領兵赴河中四年進封溫國公致仕仍居京師嘗遣近侍就第延問時勅宰臣邀赴省議利害焉晉陽公郭文振又以總制公府薦之哀宗正大二年起拜平章政事進封英國公行尚書省於衛州上諭曰卿向在河東朝廷倚重今河朔州郡多歸附須卿圖畫卿先朝大臣必濟吾

事大河以北卿皆節制鼎力疾赴鎮河朔州郡來歸者益眾
三年七月卒鼎通達吏事有度量爲政鎮靜所在無賢不肖
皆得其懽心南渡以來書生鎮方面者惟鼎一人而已

聶天驥字元吉五臺人至甯進士調汝陰簿歷睢州司候封
邱令興定初辟尚書省令史時胥吏擅威士多附之獨天驥
不少假借尋授吏部主事權監察御史夏使互市會同館外
戚有身貿易者天驥言大官近利失朝廷體且取輕外方遂
忤太后旨出爲同知汝州防禦使事未赴特旨遣領金安軍
節度副使兼行陝西尚書省都事未幾入爲右司員外郎轉
京兆治中尋行衛州尚書六部事宿州總帥牙古塔救慶陽
充經歷官圍解從別帥守邠帥欲棄州而東天驥力勸止之
不從帥逮天驥降京兆治中尋有訟其寃者召爲開封僉事

旬月復右司員外郎母憂奪哀復職留汴中崔立變天驥被創甚臥十餘日其女舜英謁醫治療天驥歎曰吾幸得死兒女曹乃爲謁醫尙欲我活耶竟鬱鬱以死

禹顯鴈門人貞祐初隸上黨公張開累有戰功授義勝軍節度使兼沁州招撫副使元光二年四月元將達兒解按察兒攻河東張開遣顯扼龍舟谷夾攻敗之擒元帥韓光國獲輜重甲仗甚眾追至祁縣而還所歷州縣悉復之顯願將兵二百守襄垣八年不遷元將集河朔步騎數千攻之數四不能拔旣而戰於玉女寨大獲開言於朝權元帥府都監正大六年十一月軍內變城破被擒帥以鐵繩鈐之密與部曲二十人遁去將往從開元兵四向追顯匿山寺中被執不屈死

時年四十一

楊閏代人少孤鞠姊夫禹顯家後上黨公張開令顯以繇上
招撫使守襄垣閏從之費止敵驛夜斫營凡戰禦事不以勞
顯墜夷城積石力戰五年敵引去不敢逼授懷遠大將軍同
知沁南軍節度使事尋行銅鞮令行夜至隘樓止宿其上中
敵偵刺未殊猶張空拳搏數人以饋年二十有九明年顯亦
斃開不能獨守上黨遂走汴

以上代州

白華字文舉隕州人貞祐三年進士爲應奉翰林文字正大
元年累遷樞密院經歷官二年九月宋將彭義斌由山東取
邢洺磁華上奏曰北兵有事河西故我得少寬今彭義斌招
降河朔郡縣駸駸及於正定宜及此大舉以除後患院官遣
華相視彰德實擠之也事竟不行三年五月夏全自楚州來
奔十月集議和宋上問全所以來華奏全狼狽而北止求自

免無他慮也華由是爲上所知和議亦寢五年增築歸德城
擬工數百萬華往相役減工三之一六年權樞密院判官上
欲遣軍招李全華對曰李全特一猾寇耳老狐穴豕待夜而
出何足介懷臣所慮者今北方有事未暇南圖一旦事定必
來攻矣與我爭天下者此也全何預焉今宜姑養士馬以備
北方使全果有謀亦當發於北朝息兵之日當此則我易與
矣事遂寢命至衛州經畫帥府及恒山公府上嘗諭曰合喜
蒲阿皆武夫一語不相入便爲齟齬今以汝調停之衛州之
委亦前日調停之意也國制樞密院倚任者名奏事官其目
曰承受聖旨曰奏事曰省院議事外又有難者曰備顧問故
以華處之五月遣往邠州蒲阿軍期六日往復華自量日可
馳三百里如期而還七年正月奏僉揀河南府州防城軍以

今見在九十七萬無致他日資敵五月正授樞密判官八年
屢遣往閩鄉二省軍五月又往桃源二省軍至宋八里莊城
門而還是夜二更八里莊次將送款九月防秋華議徑往河
中一日可渡如此中得利襄漢軍馬亦當退矣蒲阿意不同
乃止天興元年四月併樞密院歸尚書省書生輩妒華得君
嘗以語撼之遂罷十二月遣近侍問華請如春秋紀季入齊
事起爲右司郎中奏今當直赴汝州與之一決汝州戰又不
如半途戰半途戰又不如出城戰所以然者我軍食力猶在
馬則豆力猶在也尋從至衛州二年三月遣往鄧會移刺瑗

以鄧入宋後北歸

保德州

劉祖謙字光甫安邑人承安五年進士歷州縣有政迹拜監
察御史以鯁直稱正大初爲右司都事除武勝軍節度副使

召爲翰林修撰家多藏書金石遺文略備父東軒工畫故祖謙以鑿裁自名信筆作簡牘尤可觀一時名士如雷淵李獻能王渥皆遊其門得人一詩可傳必殷勤稱道惟恐不聞人

以此稱之子敏仲

州解

李愈字景韓絳州正平人業儒術登正隆五年詞賦進士調河南澠池主簿察廉優等爲平陽監酒副使遷冀氏令至解州刺史章宗卽位召授同知中都路都轉運使改同知濟南府明昌二年授曹王傅兼同知定武軍節度使從王賜宴北都還言諸部所貢馬止可委招討司受於界上量給迴賜務省費以廣邊儲擬自臨潢至西夏沿邊創設重鎮十數仍選猛安謀克勳臣子孫有材力者使居其職田給於軍者許募漢人佃種不必遺輓牛頭粟而兵自富強矣上覽其奏謂愈

一書生用心之忠如是下尙書省議愈尋遷同知西京留守復表乞斷自宸哀上納用焉自是命五年一宴賜人以爲便改棣州防禦使未幾授大興府治中北京提刑范楫知歸德府鄧儼各舉自代擢爲河南路提刑使上言本司見置許州乞移治南京留官一員餘分部巡按從之時九路提刑以愈爲最五年入觀平章守貞謂愈見職甚幹上曰愈敢爲所論河決事宜遣大臣護視以慰人心其言良是尋改河平軍節度使承安二年徙順義軍奏屯田利害上遣使宣諭仍降金牌俾領其事四年刑部尙書闕特召用之尋爲賀朱正旦副使泰和二年春將幸長樂川愈切諫曰方今戊卒貧弱百姓騷然三汭尤近界陞兼聞泰和宮在兩山間地形狹隘雨潦湍集固不若北宮池臺之勝優游閒適也不從夏四月復言

一旦不警臣恐丞相襄樞密副使闍母等皆不足恃况皇嗣未立羣心無定豈可遠事逸游哉上異其言復授河平軍節度使改知河中府致仕六年卒年七十二謚清獻著狂愚集

二十卷

梁襄字公贊絳州人父定早亡養於叔父甯性穎悟日記千餘言大定三年擢進士第調同官主簿遷涇化令有善政察廉升慶陽府推官召爲薛王府掾時世宗將幸金蓮川有司具辦襄上疏極諫言尤詳切世宗納之遂爲罷行仍諭輔臣曰梁襄諫朕幸金蓮川朕以其言可取故罷其行襄由是以直聲聞擢禮部主事太子司經選爲監察御史尋轉中都路都轉運戶籍判官未幾遷通遠軍節度副使以喪去服闋授安國軍節度副使同知定武軍節度事避父諱改震武軍太

常卿張暉曹州刺史段鐸薦襄學問該博練習典故可任禮
官轉同知順義軍節度使事歷東勝州陝州刺史終保大軍
節度使襄長於春秋左氏傳至地理氏族無不該貫自蚤達
至晚貴膳服常淡薄議者雖謂太儉而人士雅欽之子持勝
持勝字澗甫生而多力善射泰和六年進士復中宏詞累官
太常博士遷咸平路宣撫使經歷官典定初宣撫使蒲鮮萬
奴有異志欲棄咸平持勝力沮萬奴怒杖之上京行省太平
與萬奴通謀口稱持勝忠署左右司員外郎而焚毀上京奪
元師承充軍持勝與提控咸平治中裴滿賽不萬戶韓公恕
約殺太平復推承充行省事事泄俱被害贈中順大夫韓州

刺史

李華字君美河津人父餘慶三至廷試不遂華穎悟讀書一

再誦軌記大定二十五年進士調正定主簿察廉遷韓城令同知州事納富商賂以歲課軍須配屬縣華獨不聽提刑司以爲能遷河東北路轉運都勾判官太原推官母憂起復大興縣令中都左警巡使南京提刑判官監察御史同知昭義軍節度事父憂起復僉南京按察事泰和六年伐宋華被詔體訪三路官員能否改刑部員外郎歷觀州刺史知府徒單南平貴倖用事勢傾中外遣所親以進取誘華華拒之貞祐二年遷戶部侍郎宣宗遷汴行河北西路六部事遷知開封府河南勸農使戶部吏部尙書陝西行省參議官四年拜參知政事華奏有司各以情見引用斷例牽合附會實啓倖門乞凡斷例勅條特旨奏斷不爲永格者不許引用皆以律爲正詔從之是歲元兵破潼關上表請罪不許罷爲絳陽軍節

度使興定元年知平陽府事權參知政事代胥鼎爲河東行省是時興兵伐宋華上書曰今之計當休兵息民養銳待敵宋雖造釁止可自備若不忍小忿以勤遠畧恐或乘之不能支也不納二年十月平陽被圍元兵入華自殺贈尙書右丞陳規字正叔絳州稷山人博學能文明昌五年詞賦進士貞祐初爲監察御史三年上書論參政侯摯及警巡使馮祥詔罷祥職且諭規曰卿敢言如此朕甚嘉之時沿河悉禁米斛河北艱食四年規上言昔秦晉爲隣一週年饑則互輸之粟今聖主在上一視同仁豈可以一家之民自限南北坐視困餒而不救哉况軍民効死禦敵若復乏食何以自聊人心一搖爲害不細請於太陽孟津等渡閱視過河物每日官收毋得過半庶幾利厚息者輻輳而往公私稍足巡按至徐州言

節度副使紇石烈鶴壽往討紅襖賊大掠良民乞赦有司放
免餘路但有掠國人爲驅者一體施行庶幾河朔有所係望
詔從之又奏河北潁河州縣距一舍爲一寨籍居民爲兵數
寨置一總領率皆閑官無賴徵逐取給日以爲常敵至伏匿
不出敵去騷擾如初朝廷重柄豈可輕假小人宜皆罷去第
委宣撫司從宜措畫足矣制可七月復條陳八事曰責大臣
以身任安危任臺諫以廣耳目崇節儉以答天意選守令以
結民心博謀羣臣以定大計愛重官賞以勸有功選將帥以
明軍法練士卒以奮兵威而論責大臣特以碎末互生異同
坐視利害泛然不問親其細而不圖其大上付省詰問宰執
惡其紛更謂言多不當上初無意加罪祇令御史臺諭之尋
出爲徐州帥府經歷哀宗立召爲右司諫權吏部郎中正大

元年改充補闕又言將相非才且薦數人可用者二年奏五事一尙書省兼理樞密院如大定明昌故事二簡留親衛軍三沙汰冗軍減行樞密院帥府四選大臣爲宣撫使招集流亡五選官置所議一切省減略施行之四月大旱詔規審理冤滯規奏雨水不時則責審理其職燮理者當何如且河南一路便宜行院帥府從宜凡二十陝西行尙書省二帥府五皆得以便宜殺人寃獄在此不在州縣上善之而不能有爲也十月與右拾遺李大節劾同判大陸親事撤合輦諂佞招權納賄出撤合輦爲中京留守朝廷快之五年二月又與大節言將帥出兵每爲近臣牽制不得專輒至送宣傳旨公受賂遺而臣僚多罪同罰異上納之規言事不少假借凡宮中舉事必恐其有言嘗召文繡署令王壽孫作大紅半身繡衣

及進御召問陳規知否若知必以華飾諫我我實畏其言而一時近臣竊議亦曰畏陳正叔後出爲中京副留守未赴卒士論惜之規剛毅質實篤學至老不廢詩有律度渾源劉從益見其所上八事歎曰宰相材也每與人論時事輒憤惋南渡後諫官稱許古陳規而規不以訐直自名尤見重云死之日家無一金知友爲葬之于良臣

李復亨字仲修榮州河津人年十八登進士復中書判優等調臨晉主簿護送官馬入府宿逆旅有盜殺馬不取度必有仇一人橐中盛佩刀不服詰以刀蟻馬血火燬之則刃青其人款伏果與逆旅主人有仇以提刑薦遷南和令盜割民牛耳盡召里中人至使牛家牽牛徧過之至一人前牛忽驚躍詰之乃引伏察廉轉臨洮府并陝西東路戶籍河東北路度

支皆爲判官泰和中伐宋充宣撫司經歷俄遷解鹽副使歷
同知保大震武節度事母憂起復震武遷授忻州刺史貞祐
閒遷翰林直學士行三司事興定三年言近日伐宋恐宋人
乘虛掩襲故籍邊鄙民爲軍今大軍已還乞罷遣歸本業從
之復舉陳留縣令程震等二十九人農桑有效徵科均一朝
廷皆遷擢之是歲七月置京東西南三路行三司掌勸農催
租軍須科差及鹽鐵酒榷等事復亨攝西路治河南奏民間
銷毀農具以供軍器非便其汝州魯山寶豐鄧州南皆產鐵
募工置冶可以獲利且不厲民又奏陽武設賣鹽官以佐軍
用禁止滄濱鹽勿令過河使河南食陽武解鹽河北食滄濱
鹽南北俱濟詔尙書省行之九月以勸農有勞遷兵部尙書
轉吏部權參知政事四年三月真拜參知政事兼修國史七

月河南雨水害稼爲宣慰使循行郡縣凡官吏貪污不治者得廢罷推治復亨奏禁官吏會飲又奏民間差發養驛馬最甚可依舊設回馬官官給使者食料歲終會計均賦於民又奏招河東河北移民耕種河南閑田全免被災及沿邊郡縣租稅內地半之以救塗炭之民資蓄積之用詔有司議行焉無何被詔提控軍興糧草時河渡不通陝西監價踊貴乞以粟互易詔戶部從長規措復亨有會計才號能吏故驟至通顯既執政頗矜持自營譽望頓減五年因監廷試謬放進士盧元及第奪兩官罷爲安國軍節度使元光元年十一月城破自殺年四十六贈資德大夫知河中府事

以上
絳州

賈邦獻霍州霍邑縣人登進士質直有勇略元攻河東集居民爲守禦計既而兵大至居民悉降邦獻棄其家獨與其子

懿保松平寨偕權知州事劉珍共守竟能成功珍每欲辟之
輒以衰老爲辭興定四年十月兵復大至病不能避與懿俱
被執脅之以刃欲以爲鎖西元帥邦獻不屈密遣懿歸松平
遂自到贈奉直大夫本縣令

王佐字輔之霍州農家子輕財好施善騎射興定中聚兵數
千權領霍州事胡天祚承制加忠勇校尉趙城丞遷霍邑令
同知蒲州軍事權招撫副使蒲州經略使詔遷宣武將軍遙
授寶昌軍節度副使元兵取青龍堡佐被獲署霍州守將隸
元帥崔環質其妻子佐與招撫使成天祐謀殺環天祐疑佐
妻子在環所對曰佐豈顧家者耶元光二年七月因環出獵
殺之率軍民數萬請命加龍虎衛上將軍元帥右監軍兼知
平陽府事與史詠素不協詔徙沁州玉女寨同禹顯聽張開

節制救襄垣中流矢卒贈金吾衛上將軍錄其子爲符寶典書

呼延實趙城人本楊沃衍部曲以戰功至寶昌軍節度使閒居汝州之西山天興元年正月防禦使張楷自揣不能服衆乃以州事託實而自往鄧州實遂領汝州青楊砦事後姬汝作入州城守不能相下實欲遷州入山謂他日必爲元兵所破汝作不從詳議官楊鵬和釋之實乃還山汝作遂爲總帥不復與實相關二年八月州人梁舉殺汝作實時爲峴山帥

又詔併力討舉

以上霍州

馬慶祥字瑞甯本名習禮吉思先世自西域徙家淨州天山泰和中試補尙書省譯史大安初選使副通問於元上曰習禮吉思智辯通六國語往必無辱也使還授開封府判官內

城之役充應辦使不擾而事集未幾拜鳳翔府路兵馬都總管判官元光元年冬十一月元將萌古不花將攻鳳翔行省傲與治中胥謙分道清野將行命畫工肖其貌付家人或曰君方壯何乃爲此不祥慶祥曰非汝所知也明日遂行遇先鋒於澮水戰不利且行且戰將及城元兵邀其歸路令衆騎曰吾屬荷國厚恩竭力効死乃其職也諸騎皆曰諾人殊死戰良久矢盡元兵圍數匝欲降之軍擁以行語言往復與謙皆不屈死贈輔國上將軍恒州刺史諡忠愍正大二年詔褒死節士十有三人立褒忠廟錄其孤而以習禮吉思爲首

趙重福字履祥豐州人通大小字試補誥院令史轉兵部譯使陝西提刑知法遷陝西東路都勾判官右藏庫副使同知陳州防禦事時宋謀人蘇泉入河南重福迹之至魚臺見前

一舟將渡河令從者大呼泉姓名中有倉皇失措者執之果泉也改滄州鹽副使歲饑民煮鹵賣以給食往往被杖重福曰甯使課殿不忍殺人歲滿當降右丞完顏匡三司按出虎特薄其罰除織染署令大安三年佐戶部尙書張焯調兵食於古北口遷都水少監貞祐二年行西北路六部郎中兼戶部員外郎治密雲縣守城有功遷同知河間府事行六部侍郎權清州防禦使攝河北東路兵馬都總管三年河間被圍密雲同事劉中勳降不聽時兵少又多羸疾勸父老率子弟强者戰弱者守圍乃解去遷河東北路轉運使致仕元光二年卒

完顏彝字良佐小字陳和尚豐州人系出蕭王諸孫父乞哥泰和南征以功授同知階州軍事後戰歿於嘉陵江從兄鼎

字國器小字斜烈畢里海世襲猛安以善戰知名自壽泗元帥轉安平都尉鎮商州威望甚重敬賢下士有古賢將風嘗搜伏得歐陽修子孫併其族屬鄉里三千餘人縱遺之貞祐中彘爲元兵所掠帥置諸帳下時母尙留豐州彘託以省母乞還帥以卒監之至豐乃與斜烈劫殺監卒奪馬牽其母南奔元兵追之由他路得免兄弟共輓鹿車載母渡河宣宗授鼎都統彘補護衛旋轉奉御彘天資高明雅好文史人以秀才目之從鼎壽泗帥府充宣差提控佩金符鼎辟太原王渥爲經歷渥投彘孝經小學論語春秋左氏傳略通其大義暇輒作牛毛細字如寒苦士正大二年鼎爲總領屯方城復隨以往鼎嘗病鎮防軍葛宜翁與李太和相毆訴彘不直宜翁量笞之宜翁鬱鬱死其妻訟爲故殺當彘大辟彘聚書獄中

讀之明年鼎病愈詔提兵而西入見哀宗怪其瘦甚曰卿甯以方城獄未決故耶吾今赦之矣鼎尋卒上聞亟馳赦奠諭以汝兄死失吾一名將今故曲法赦汝他日奮發立功國得汝力我始不爲妄赦奠泣且拜退以白衣領紫微軍都統轉忠孝軍提控五年元兵入大昌原平章合達命爲前鋒時奠業沐浴易衣若將就木裨者擐甲上馬不反顧是日以四百騎破八千衆三軍踴躍自軍興二十年始有此捷奏功第一手詔褒諭授定遠大將軍平涼府判官世襲謀克一日名動天下忠孝軍皆回紇乃滿羌渾及被俘來歸者最號難制奠御之有方坐作進退皆中程式所過州邑給常料外秋毫無犯街曲不復喧雜每戰則先登陷陣疾若風雨諸軍倚以爲重六年有衛州之勝八年有倒回谷之勝自刑徒不四五遷

爲禦侮中郎將嘗與同列議副樞移刺蒲阿曰副樞好趨小利今日得生口三百明日得牛羊一二千士卒喘死則不復計國家積年兵力皆爲是人破除盡矣蒲阿聞之置酒會諸將至羹曰汝曾短長我誠有否羹飲畢徐曰有蒲阿見其無懼容漫爲好語云有過當面論無後言也合達入鄧州留羹閱鄉南十五里羹尋隨而往九年正月三峰敗鈞州城破縱軍巷戰羹趨避隱處殺掠定乃出自言曰我忠孝軍總領陳和尙太昌原衛州倒迴谷之勝皆我也若死亂軍中人將謂我負國家今日明白死天下必有知我者時欲其降砍足脛折不爲屈割口吻至耳噴血而呼至死不絕元將義之醇以馬湏祝曰好男子他日再生當令我得之羹年四十一贈鎮南軍節度使塑像褒忠廟勒石紀其忠烈

以上歸化城廳

武都字文伯東勝州人大定二十二年進士調陽穀主簿遷
商水令縣素多盜廉得姓名榜通衢約毋再犯悉奔他境察
廉遷南京路轉運度支判官累遷中都路都轉運副使以視
老與弟監察御史郁俱乞侍及服闋調太原治中再遷藥州
刺史充宣差北京路規措官拘括散逸官錢百萬入爲戶部
郎中權右司奏事稱旨由海道漕遼東粟賑山東高其價直
募致海賈船遷中都西京按察副使按察使大安三年充宣
差行六部侍郎行西南路六部尚書佐元帥抹撻盡忠備禦
西京有勞召爲戶部尚書賜銀絹宣宗卽位議衛紹王尊號
不當削時人趨之知大興府佩虎符便宜行事彈壓中外軍
民坐被酒以褻衣見詔使解職起爲刑部尚書河東路宣撫
使興定元年卒

程震字威卿東勝人與其兄鼎俱擢第震入仕有能聲興定初任陳留令治爲河南第一召拜監察御史彈劾無所撓時皇子荆王爲宰相家僮席勢侵民震劾奏曰荆王以陛下之子任天下之重不能上贊君父同濟艱難顧乃專恃權勢蔑乘典禮開納貨賂進退官吏縱令奴隸侵漁細民名爲和市其寔脅取諸所不法不可枚舉陛下不能正家而欲正天下難矣上乃責荆王出內府銀以償物直杖司馬以下及大奴尤不法者數人攝侍御史兼戶部員外郎運京師米振徐邠饑經晝周至無一失當州民請於京師帥府願留程御史以活殘民詔聽留荆王積不平密遣奴誘奸民徐璋造蜚語訟之臺王自執奏上頗不直之哀宗在東宮亦鑒其枉密諭推問者勿爲留難已而璋伏誣告罪震當復職王卒援官人與

部民對訟律罷其官正大元年卒震剛直有才幹少由經童入仕夢人呼爲御史故以諫輔自期及當官忘身殉國不少私假臺網大振小人側目不能久留於朝士論惜之以上托完顏寓本名訛出西南路猛安人大定二十八年進士累調河東北路提刑司知事改同知遼州軍州事召爲國史院編修官大安中歷翰林待制兼侍御史貞祐初議衛紹王事寓請降復王封時置招賢所村夫王守信敢爲大言以請葛亮爲不知兵寓薦於朝詔署行軍都統張行信高琪言守信不可用上然之寓累遷安化軍節度使兼山東路統軍副使興定元年四月詔以本官權元帥左都監行元帥府事和輯苗道澗移刺鐵哥軍十二月密州破寓爲亂軍所殺

完顏安國字正臣其先占籍上京世有戰功祖斜婆授西南

路世襲合札謀克安國沈雅有謀蓋尤善騎射正隆元年爲謀克常以少擊衆大定中爲常山簿轉虹縣令選充虞王府掾再遷儀鸞局副使明昌元年晉使會大石部長有乞修歲貢者詔安國往使至則羅拜執禮時北阻鞅迫塞垣隣部邀安國俱行討安國以未奉詔爲辭強之不可或休以危言答曰大丈夫豈以生死易節鬻骨邊庭不猶愈於病死牖下衆壯其言餽贖如禮以奉使稱旨升武衛軍都指揮使出爲西北路副招討六年左丞相夾谷清臣出兵爲先鋒都統適臨潢秦州部屬叛先討定之以功遷本路招討使兼威遠軍節度使承安元年大鹽澤之戰殺獲甚衆詔賜金幣旣而右丞相襄總大軍爲兩路都統大捷於多泉子襄遣安國追敵僉言糧道不繼安國曰人得一羊可食十餘日不如驅羊以襲

之便襄從之安國統所部萬人疾驅降其部長進官四級遷左翼都統承安二年以營邊堡功召僉樞密院事賜虎符還邊得以便宜從事並塞諸部降諭使輸貢如初進拜樞密副使泰和元年特授世襲西南路延晏河猛安兼合札謀克帝幸慶甯宮命嚴飭邊備奏招西南路邊戍私竄者以安人心上是之三年致仕封道國公四年起復前職卒輟朝葬以執政禮贈特進安國在軍旅幾十五年號令嚴明又善伺知敵人虛寔及山川險易所向輒克諸部入貢能一一呼其祖先弟姪名字以戒諭之諸部皆震悚焉

紇石烈桓端西南路忽論宋割猛安人襲兄銀朮可謀克泰和中充行軍萬戶破宋兵於蔡州加宣武將軍渡淮敗宋步騎萬五千於鷓子嶺遂克安豐軍軍還除同知懷遠軍節度

使事大安三年遙授顯德軍節度副使徙東路宣撫司都統
收移刺留哥五千眾於御河寨降萬餘人加驃騎衛上將軍
遙授同知順天軍節度事貞祐二年爲宣差副提控同知婆
速路兵馬都總管行府事三年蒲鮮萬奴侵婆速近境遣都
統擊卻之四月復掠上古城別攻望雲驛遣軍拒戰破其眾
數千於三义里五月又拔其大甯鎮壘九月拒戰易池萬奴
眾潰去因招十一猛安復來附四年遣王汝弼由海道奏事
宣宗嘉其功遷遼海軍節度使同知行府事宜差提控如故
婆速路温甲海世襲猛安是歲改邳州刺史充徐州界都提
控紅襖賊數萬攻邳州破之於黃山賊復來擊敗之溺沂水
死者甚眾賊數萬圍沂州同知防禦事僕散撒合突圍出求
救率兵赴之撒合還入城內外夾擊殺萬餘人賊乃去進金

紫光祿大夫兼同知武甯軍節度事提控如故興定元年連破宋兵累遷武衛軍都指揮使仍權右都監行元帥府於息州又權僉樞密院事代石蓋女魯歡於徐州四年冬上言竊聞宋人與李全將併力來攻當預爲之防五年正月召至汴力疾草奏大略以南北皆用兵當預防其患及防河數策無何卒年四十五勅有司給喪事

完顏蒲剌都西南路按出灰必刺罕猛安人充護衛除泰定軍節度副使累官原州刺史同知臨洮府西京留守事崇慶元年遷震武軍節度備禦有功遷一官初置東西面經略司就充西面經略使上言管內太和嶺諸隘屯兵控制邊要行帥府輒分臣兵萬二千成眞定餘眾不足守禦近復簡精銳二千七百以往今見兵不滿萬老羸者十七八臣死固不足

惜願國家之事不可不慮新設經略移文西京太原河東取軍馬並稱非臣所統詔真定遷其精銳二千七百人西京太原嵐州有警約爲應援州郡皆不欲屬經略司遂罷經略官入僉樞密院事改左副點檢四年遷兵部尙書真定中致仕卒

吳僧哥西南路人拳勇善騎射大安閒籍山西人爲兵充馬軍千戶有功貞祐初遷萬戶權順義軍節度使復取朔州真授同知節度使事弟迪刺授節度副使燕曹兒授節度判官提控馬壽兒以下遷授有差僧哥乞賜糧十五萬斛朝廷以應州已破朔爲孤城其勢不可守乃遷朔之軍民九萬餘口分屯於嵐石隰吉絳解閒未行元兵至朔州戰七晝夜有功加遙授同知太原府事兼同知節度使事迪刺石州刺史曹

兒同知岢嵐州防禦使事四年始遷其民南行且戰且行者數十里僧哥力憊馬躓死焉贈鎮國上將軍順義軍節度使伯德窰哥西南路人壯健沈勇元兵克西南路鄰郡皆降窰哥獨不屈貞祐五年東勝州破窰哥與姚里鴉胡姚里鴉兒招集義軍披荆棘復立州事興定元年詔遙授武州刺史權節度使姚里鴉胡權同知節度使事姚里鴉兒權節度副使興定三年遙授同知晉安府事尋真授東勝軍節度使東勝被圍糧絕率眾潰圍走保長甯寨九月復被圍窰哥死之上

高殺道

右金五十九八

山西通志卷一百二十六